

司
夫
醫
酒
如
子
設
書



木艸經疏卷七

艸部上品之下

總五十三種今疏其要者二十五種

藍實

芎藭

黃連

絡石

木連附

蒺藜

黃耆

肉蓯蓉

防風

蒲黃

續斷

漏蘆

營實

天名精

決明子

丹參

茜根

五味子

蘭艸

忍冬

蛇床子

景天

茵陳蒿

沙參

王不留行

長松

藍實味苦寒無毒主解諸毒殺蟲蚊疰鬼螫毒久服頭

不白輕身其葉汁殺百藥毒解狼毒射罔毒

〔疏〕藍實稟天地至陰之精故其味苦寒而無毒其用主解諸毒殺蠱蚊疰鬼螫毒久服頭不白頭白者血熱也藍能涼血而解熱故令髮不白也熱去而血得所養故身輕其葉汁解百藥毒解狼毒射罔毒藥性論云藍實味甘能填骨髓益心力汁止心煩躁由此觀之苦寒而兼甘可知矣日華子又云治天行熱狂疔瘡遊風熱毒腫毒風癩除煩止渴殺疳解毒藥毒箭金瘡血悶排膿小兒熱疳小兒丹熱最爲要藥其功用之廣具如本艸所載蓼藍最堪入藥甘藍人食去熱黃

主治參互

藍汁入麝香雄黃治蜘蛛咬有神 乾藍爲末同犬

肉空腹食之主長肉內塞

簡誤

虛寒人及久泄畏寒腹中覺冷者勿服

芎藭味辛溫無毒主中風入腦頭痛寒痺筋攣緩急金瘡婦人血閉無子除腦中冷動面上遊風去來目淚出多涕唾忽忽如醉諸寒冷氣心腹堅痛中惡卒急腫痛脇風痛溫中內寒

動宜作痛

疏芎藭稟天之溫氣地之辛味辛甘發散爲陽是則氣味俱陽而無毒陽主上升辛溫主散入足厥陰經

血中氣藥扁鵲言酸以其入肝也故主中風入腦頭
痛寒痺筋攣緩急金瘡婦人血閉無子別錄除腦中
冷動面上遊風去來目淚出多涕唾忽忽如醉諸寒
冷氣心腹堅痛中惡卒急腫痛脇風痛溫中內寒已
上諸病皆病在血分正以其性走竄而絕無陰凝黏
滯之性故入血藥上行而不可多用耳

主治參互

同地黃當歸芍藥爲四物湯通主入血分補益 同
荆芥白芷當歸地黃芍藥木甘艸治破傷風冬月加
桂枝 同當歸地黃乾漆延胡索五靈脂芍藥牡蠣
粉京三稜治血瘕 同白芷茜根黃耆金銀花生地

黃能排膿消瘀血 同甘菊花當歸地黃天門冬白
芍藥炙甘草專主血虛頭痛火盛者加童便服 同
當歸尾桂心牛膝治子死腹中 同續斷懷熟地白
膠杜仲山茱萸五味子人參黃耆酸棗仁治血崩久
不止

簡誤

芎藭性陽味辛凡病人上盛下虛虛火炎上嘔吐咳
嗽自汗易汗盜汗咽乾口燥發熱作渴煩躁法竝忌
之

黃連味苦寒微寒無毒主熱氣目痛背傷淚出明目腸
澀腹痛下痢婦人陰中腫痛五藏冷熱久下洩澀膿血

止消渴大驚除水利骨調胃厚腸益膽療口瘡久服令人不忘

〔疏〕黃連稟天地清寒之氣以生故氣味苦寒而無毒味厚於氣味苦而厚陰也宜其下洩欲使上行須加引導入手少陰陽明足少陽厥陰足陽明太陰爲病酒之仙藥滯下之神艸六經所至各有殊功其主熱氣目痛背傷淚出明目大驚益膽者涼心清肝膽也腸澼腹痛下痢別錄兼主泄澼泄者瀉利也澼者大腸下血也俗呼爲臟毒除水利骨厚腸胃療口瘡者滌除腸胃脾三家之溼熱也久服令人不忘者心家無火則清清則明故不忘禪家習定多飲苦茗亦此

義爾

主治參互

同赤檉木葉入三黃石膏湯治痧痧已透而煩躁不止有神 入當歸六黃湯加棗仁龍眼治盜汗有神

同地黃甘菊荆芥穗甘艸梢芎藭柴胡蟬蛻木通

治風熱上攻目赤痛 黃連末一兩同雄羊肝一具

生搗勻眾手丸如桐子每服以滾漿水吞廿一九諸

眼目疾及障翳青盲皆主之禁食猪肉雖油汁亦勿

入口作六劑必效矣 同當歸甘菊花人乳浸蒸入

明礬銅綠各少許洗目甚效 同芍藥蓮子菹豆升

麻甘艸滑石紅麴治一切滯下膿血 同槐花枳殼

乳香沒藥治滯下純血腹痛煮服神效 同五穀蟲

蘆薈白蕪荑青黛白槿花白芙蓉花治小兒一切疔

熱如神 同赤小豆為細末傅痔瘡妙 同乾葛甘

艸升麻芍藥治痧癰後泄瀉 同五味子麥門冬乾

葛治酒病酒傷如神 同五味子甘艸煮濃汁漱口

治口糜口瘡良 同麥門冬五味子治卒消渴小便

多良 同人參蓮子治虛人患滯下及老人產婦滯

下不止

簡誤

黃連味大苦氣大寒羣艸中清肅之物其處上經譬

猶皋陶之在虞廷明刑執法以禁民邪是其職也稷

契夔龍之事則非其任矣故祛邪散熱蕩滌腸胃肅
清神明是其性之所長而於補益精血溫養元氣則
其功泊如也凡病人血少氣虛脾胃薄弱血不足以
致驚悸不眠而兼煩熱躁渴及產後不眠血虛發熱
泄瀉腹痛小兒痘瘡陽虛作泄行漿後泄瀉老人脾
胃虛寒作瀉陰虛人天明溏泄病名腎泄眞陰不足
內熱煩躁諸證法咸忌之使人危殆大忌猪肉
絡石味苦溫微寒無毒主風熱死肌癰傷口乾舌焦癰
腫不消喉舌腫不通水漿不下大驚入腹除邪氣養腎
主腰髖痛堅筋骨利關節久服輕身明目潤澤好顏色

不老延年

傷宜
作瘍

〔疏〕絡石稟少陽之令兼得地之陰氣其味苦其氣溫微寒而無毒入足陽明手足少陰足厥陰少陽經故主風熱死肌癰傷口乾舌焦癰腫不消喉舌腫水漿不下皆苦溫通氣血血屬陰陰寒入血而除熱之效也又能除邪氣養腎主腰髓痛堅筋骨利關節療蛇毒心悶刀斧傷擣封立差皆涼血除熱之功也本經久服輕身明目潤澤好顏色不老延年陳藏器以爲能變白亦指益陰涼血而言也生石上者良

主治參互

絡石搗汁入諸解毒藥治發背癰疽神效 外臺秘要治喉痺喘息不通須臾欲絕以絡石一兩水一升

煎取一大盞去滓細喫須臾卽通

簡誤

陰臟人畏寒易泄者勿服

木蓮薜荔也附本而生得木氣故名木蓮俗呼鬼饅頭
頭黃緣樹木墻壁三五十年漸大枝葉繁茂葉長二三寸厚若石韋生子似蓮房打破有白汁停久如漆
六七月實內空而紅則滿腹細子大如稗子一子一鬚其味微澀其殼虛輕一年一熟子亦入藥頌曰薜荔絡石極相類莖葉粗大如藤狀木蓮更大於絡石
四時不彫蓋稟天地陰寒之氣而生者也故其味酸寒辛平無毒用其葉研爛絞汁和蜜飲數升并傳癰

上能消背癰下利即愈考木蓮無經文者為其與絡石相類也俱以杜仲牡丹為之使惡鐵落畏貝母菖蒲

蒺藜子味苦辛溫微寒無毒主惡血破癥結積聚喉痺乳難身體風痒頭痛欬逆傷肺肺痿止煩下氣小兒頭瘡癰腫陰瘡可作摩粉其葉主風癢可煮以浴久服長肌肉明目輕身

疏蒺藜有二種一種同州沙苑白蒺藜一種秦州刺

蒺藜白者感馬精所生刺者感地中陽氣所生本經苦溫別錄加辛及微寒竝無毒夫苦能泄溫能宣辛主散主潤故刺蒺藜主惡血破癥結積聚喉痺乳難

身體風癢頭痛欬逆小兒頭瘡癰腫陰癩葉主風癢
可煮以浴辛入肝肝主風也藥性論云白蒺藜味甘
微腥甘中必有辛辛能潤故主欬逆傷肺肺痿止煩
下氣久服長肌肉明目輕身以其入腎益精故也專
餌長年效可責矣單行雜療主治良多本草諸方咸
堪選用形如羊腎圓而細色如菜豆嚼之作菜豆腥
氣爲末煮之則香同新茶者眞

主治參互

刺蒺藜同何首烏菴菴葉胡麻地黃木瓜荆芥穗天
門冬黃檗治遍身風癢 同州白蒺藜得蓮鬚山茱
萸五味子蓮肉覆盆子魚膠龍骨白膠能固精益腎

令人有子兼主小便遺瀝 得甘菊花甘枸杞子決

明子女貞實槐角子能明目 外臺秘要單服能復

明三十年目疾 黃耆味甘微溫無毒主癰疽久敗瘡排膿止痛大風癩

簡誤

同州蒺藜性能固精命門火熾陽道數舉交媾精不

得出者勿服

黃耆味甘微溫無毒主癰疽久敗瘡排膿止痛大風癩

疾五痔鼠瘦補虛小兒百病婦人子藏風邪氣逐五藏

間惡血補丈夫虛損五勞羸瘦止渴腹痛洩痢益氣利

陰氣生白水者冷補其莖葉療渴及筋攣癰腫疽瘡

疏黃耆稟天之陽氣地之冲氣以生故味甘微溫而

無毒氣厚於味可升可降陽也入手陽明太陰經甘
乃土之正味故能解毒陽能達表故能運毒走表甘
能益血脾主肌肉故主久敗瘡排膿止痛風爲陽邪
凡賊風虛邪之中人也則病癘風經曰邪之所湊其
氣必虛性能實表則能逐邪驅風故主大風癩疾五
痔鼠瘦補虛兼主小兒天行痘瘡之在陽分表虛氣
不足者小兒胎毒生瘡癩別錄又主婦人子藏風邪
氣逐五藏惡血者血不自行隨氣而行參合血藥則
能之矣補丈夫虛損五勞羸瘦者通指因勞陽氣乏
絕所生病也甘溫益元氣甘溫除大熱故通主之氣
旺則津液生故止渴血虛則腹痛中焦不治亦腹痛

脾胃之氣不足則邪客之而洩痢補中氣則諸證自除矣益氣利陰氣者陽生陰長故也

主治參互

黃耆在補中益氣湯甘溫能除大熱爲治勞倦發熱之要劑 同生熟地黃黃檗黃芩黃連當歸加酸棗仁炒熟研爲治陰虛盜汗之正法 本方去三黃加人參五味子酸棗仁治表虛自汗 同桂枝白芍藥防風炙甘草能實表治表虛畏風傷風自汗 與茅山朮生地黃等分牛膝黃檗減半作丸治積年溼毒 臙瘡百藥不效 外臺秘要主甲疽瘡腫爛生腳指甲邊赤肉出黃耆二兩藺茹三兩苦酒漬一宿豬脂

五合微火上煎取三合絞去滓以封瘡上日三度易其肉卽消 同白芷白及甘艸金銀花皂角刺排膿止痛 同人參甘艸治天行痘瘡陽虛無熱證

簡誤

黃耆功能實表有表邪者勿用能助氣氣實者勿用能內塞補不足胸膈氣閉悶腸胃有積滯者勿用能補陽陽盛陰虛者忌之上焦熱甚下焦虛寒者忌之病人多怒肝氣不和者勿服痘瘡血分熱盛者禁用肉苳容味甘酸鹹微溫無毒主五勞七傷補中除莖中寒熱痛養五藏強陰益精氣多子婦人癥瘕除膀胱邪氣腰痛止痢久服輕身

疏肉菴容得地之陰氣天之陽氣以生故味甘酸鹹
微溫無毒入腎入心包絡命門滋腎補精血之要藥
氣本微溫相傳以爲熱者誤也甘爲土化酸爲木化
鹹爲水化甘能除熱補中酸能入肝鹹能滋腎腎肝
爲陰陰氣滋長則五臟之勞熱自退陰莖中寒熱痛
自愈腎肝足則精血日盛精血盛則多子婦人癥瘕
病在血分血盛則行行則癥瘕自消矣膀胱虛則邪
客之得補則邪氣自散腰痛自止久服則肥健而輕
身益腎肝補精血之效也若曰治痢豈滑以導滯之
意乎此亦必不能之說也輒而肥厚大如臂者良

主治參互

肉苁容得白膠杜仲地黃當歸麥門冬主婦人不孕
同人參鹿茸牡狗陰莖白膠杜仲補骨脂主男子
陽痿老人陽衰一切腎虛腰痛兼令人有子 同地
黃枸杞牛膝鼈甲天門冬麥門冬當歸白膠杜仲青
嵩五味子黃檗山茱萸治五勞七傷莖中寒熱痛婦
人癥瘕 獨用數兩浸去鹹味并去鱗甲及中心膜
淡白酒煮爛頓食治老人便燥閉結有神

簡誤

泄瀉禁用腎中有熱強陽易輿而精不固者忌之
防風味甘辛溫無毒主大風頭眩痛惡風風邪目盲無
所見風行周身骨節疼痺煩滿脇痛脇風頭面去來四

肢攣急字乳金瘡內瘻久服輕身 葉主中風熱汗出

疏防風稟天地之陽氣以生故味甘溫別錄兼辛而無毒氣厚味薄升也陽也入手陽明足少陽厥陰風藥也治風通用升發而能散故主大風頭眩痛惡風風邪周身骨節疼痺脇痛脇風頭面去來四肢攣急下乳金瘡因傷於風內瘻其云主目無所見者因中風邪故不見也煩滿者亦風邪客於胸中故煩滿也風寒溼三者合而成痺祛風燥溼故主痺也發散之藥焉可久服其曰輕身亦溼去耳別錄云又頭者令人發狂又尾者發痼疾子似胡荽而大調食用之香而療風更優也

林氏此黃當讀卷門之生散人不平

主治參互

防風同黃耆芍藥則能實表止汗 同荆芥穗白芷

生地黃地榆黃耆治破傷風有神 同甘艸桔梗紫

蘇桑根白皮杏仁細辛解利傷風去紫蘇換薄荷加

石膏兼除風熱 用麻黃易紫蘇治風寒鬱於腠理

皮膚緻密無汗 入羌活湯兼除太陽經傷風寒頭

痛 亦入治風痺藥用若入治大風厲風藥中須加

殺蟲藥活血藥乃可不宜純用風藥也

簡誤

南方中風產後血虛發痙俗名角弓反張諸病血虛
痙急頭痛不因於風寒溏泄不因於寒溼二便秘澀

小兒脾虛發搐慢驚慢脾風氣升作嘔火升發嗽陰虛盜汗陽虛自汗等病法所同忌犯之者增劇

蒲黃味甘平無毒主心腹膀胱寒熱利小便止血消瘀血久服輕身益氣力延年神仙

〔疏〕蒲黃得地之陰氣兼得金之辛味其言甘平者是兼辛而言也非辛則何以能散邪又稟天之陽氣故曰微寒而無毒也如是則甘能和血辛能散結微寒能除熱入手少陰太陽太陰足陽明厥陰故主心腹膀胱寒熱利小便止血消瘀血久服輕身益氣力者是血熱瘀血傷損之病去而身輕力長也欲止血熱用欲消血生用產泰州

主治參互

得炒黑乾薑炒黑豆澤蘭當歸川芎牛膝生地黃治
產後諸血病 同車前子牛膝生地黃麥門冬治溺
血 同阿膠白膠人參麥門冬赤茯苓車前子杜仲
川續斷治血崩血淋 生納舌下數數易之消重舌
治一切跌撲傷損瘀血停滯腹中生蒲黃煮濃和
童便飲之良 能破血故治癥結五勞七傷停積瘀
血胸前痛卽發吐衄悉和涼血行血藥主之

簡誤

一切勞傷發熱陰虛內熱無瘀血者禁用

續斷味苦辛微溫無毒主傷中補不足金瘡癰傷折跌

續筋骨婦人乳難崩中漏血金瘡血內漏止痛生肌肉
及踠傷惡血腰痛關節緩急久服益氣力 地黃為之使

〔疏〕續斷得土金之氣而兼稟乎天之陽氣以生本經

味苦微溫別錄益之以辛曾得蜀中者嘗之其味帶

甘應云味苦甘辛微溫無毒使非味甘焉能主傷中

補不足非辛焉能主金瘡癰傷折跌續筋骨婦人乳

難辛能潤苦溫能散甘能益血故別錄又主崩中漏

血金瘡血內漏止痛生肌肉及踠傷惡血腰痛關節

緩急本經久服益氣力傷去血生之效也入足厥陰

少陰為治胎產續絕傷補不足療金瘡理腰腎之要

藥莖方葉似苧相對生

主治參互

欲行血理傷當以當歸牛膝肉桂延胡索同用 欲
止血補不足療崩中則與白膠阿膠地黃麥門冬杜
仲五味子山茱萸人參枸杞子黃耆同用 欲安胎
則與涼血補血順氣藥同用 欲療金瘡則與金瘡
藥同用

簡誤

禁與苦寒藥同用以治血病及與大辛熱藥用於胎
前雷公云草茆根眞似續斷誤服之令人筋輭

漏蘆味苦鹹寒大寒無毒主皮膚熱惡瘡疽痔溼痺下
乳汁止遺溺熱氣瘡癢如麻豆可作浴湯久服輕身益

本州經疏 卷七
氣耳目聰明不老延年

①疏漏蘆得地味之苦鹹稟天氣之大寒故無毒苦能
下洩鹹能軟堅寒能除熱入足陽明少陽太陽手太
陰陽明寒而通利之藥也故主皮膚熱惡瘡疽痔溼
痺下乳汁別錄又主止遺溺熱氣瘡癢如麻豆可作
浴湯又本經久服輕身益氣耳目聰明不老延年者
蓋亦通指熱散病除則臟腑自安精神自倍而臻乎
壽考也

主治參互

漏蘆同貝母連翹甘艸金銀花橘葉鼠糞白芷山豆
根山茨菇夏枯艸治乳巖乳癰 同連翹生甘菊紫

花地丁貝母金銀花甘艸夏枯艸治發背癰癤排膿
止痛 同黃耆人參排膿長肉加狗蹄猪蹄汁能下
乳

簡誤

妊娠禁用瘡瘍陰證平塌不起發者眞氣虛也法當
內塞漏蘆苦寒非所宜設

營實味酸溫微寒無毒主癰疽惡瘡結肉跌筋敗瘡熱
氣陰蝕不瘳利關節久服輕身益氣根止洩痢腹痛五
藏客熱除邪逆氣疽癩諸惡瘡金瘡傷撻生肉復肌

〔疏〕營實花於春而實於夏味酸得木之化其氣芬芳
宜其有溫之義別錄微寒以其得春之氣也故無毒

其主惡瘡結肉跌筋敗瘡熱氣陰蝕不瘳利關節別錄止洩痢腹痛五臟客熱除邪逆氣疽癩諸惡瘡金瘡傷撻生肉復肌豈非酸能收斂溫能通暢微寒能除熱而兼主乎發生之用也俗名薔薇白花野者良

主治參互

葛洪治金瘡發熱用薔薇根灰一方寸七日三外臺秘要治鯁薔薇根末水服方寸七日三又方治少小睡中遺尿不自覺以薔薇根剉以酒飲之肘後方治口瘡以根煮濃汁溫含冷易神驗用之頗稀不著簡誤

天名精味甘寒無毒主瘀血血痕欲死下血止血利小

便除小蟲去痺除胸中結熱止煩渴逐水大吐下久服
輕身耐老 垣衣爲之使

〔疏〕天地精稟天地清陰之氣故味甘辛氣寒而無毒
陰入血甘亦入血辛能散結寒能除熱故主瘀血血
痲欲死下血止血小便不利由於內熱除熱則小便
自利也小蟲者溼熱所生也辛寒能散溼祛熱則小
蟲自除也除痺者去溼之功也除胸中結熱止煩渴
祛熱散結益陰之功也逐水者溼熱散則水自消矣
唐本注云卽鹿活艸也別錄一名天蔓精南人呼爲
地菘非鶴蝨亦非豨薟乃荔枝艸也爲消痔瘡之聖
藥味甘辛故有薑稱其主破血生肌利小便殺三蟲

除諸毒腫疔瘡癩痔金瘡內射身癢癰癩不止者搯
之立已涼血除熱散結之力也

簡誤

脾胃寒薄性不喜食冷易泄無渴者勿服

決明子味鹹苦甘平微寒無毒主青盲目淫膚赤白膜
眼赤痛淚出療唇口青久服益精光輕身

疏決明子得水土陰精之氣而兼稟乎清陽者也故
其味鹹平別錄益以苦甘微寒而無毒鹹得水氣甘
得土氣苦可洩熱平合胃氣寒能益陰洩熱足厥陰
肝家正藥也亦入膽腎肝開竅於目瞳子神光屬腎
故主青盲目淫膚赤白膜眼赤痛淚出別錄兼療唇

口青本經久服益精光輕身者益陰洩熱六補肝腎
之氣所致也亦可作枕治頭風明目

主治參互

得沙苑蒺藜甘菊花枸杞子生地黄女貞實槐實穀
精艸補肝明目益精除肝臟熱之要藥 得生地黄
甘菊花荆芥黃連甘艸玄參連翹木通治暴赤風眼
淚痛 療目疾外無他用故無簡誤

丹參味苦微寒無毒主心腹邪氣腸鳴幽幽如走水寒
熱積聚破癥除瘕止煩滿益氣養血去心腹痼疾結氣
腰脊強脚痺除風邪畱熱久服利人

畏鹹水反藜蘆

〔疏〕丹參本經味苦微寒陶云性熱無毒觀其主心腹

邪氣腸鳴幽幽如走水寒熱積聚破癥除瘕則似非
寒藥止煩滿益氣及別錄養血去心腹痼疾結氣腰
脊強腳痺除風邪畱熱久服利人又決非熱藥當是
味苦平微溫入手足少陰足厥陰經心虛則邪氣客
之爲煩滿結氣久則成痼疾肝虛則熱甚風生肝家
氣血凝滯則爲癥瘕寒熱積聚腎虛而寒溼邪客之
則腰脊強腳痺入三經而除所苦則上來諸證自除
苦能洩溫能散故又主腸鳴幽幽如走水久服利人
益氣養血之驗也北方產者勝俗名逐馬

主治參互

入天王補心丹則補心 同牛膝地黃黃耆黃檗則

健步 同當歸牛膝細辛則下死胎 同鼈甲牡蠣

牡丹皮青蒿延胡索牛膝乾漆水赤蓼子主寒熱積

聚破癥除痲心腹痲疾結氣 同麥門冬沙參五味

子甘艸青蒿栝樓止煩滿 同人參麥門冬酸棗仁

地黃益氣養血 同牛膝萆薢木瓜豨薟杜仲續斷

主腰脊強腳痺除風邪畱熱 聖惠方獨用一兩爲

末熱酒每服二錢主寒疝少腹及陰相引痛自汗出

欲死 千金方治墮胎下血亦獨用丹參十二兩酒

五升煮取三升溫服日三 蕭炳云酒浸服之治風

輭腳可逐奔馬故名奔馬艸曾用有效 梅師方治

中熱油及火燒除外痛用丹參八兩細剉以水微調

取羊脂二斤煎三上三下以傅瘡上

簡誤

妊娠無故勿服

茜根味苦寒無毒主寒溼風痺黃疸補中止血內崩下血膀胱不足蹉跌蠱毒久服益精氣輕身

〔疏〕茜根稟土與水之氣而兼得天令少陽之氣以生本經味苦寒甄權云甘潔古微酸鹹溫無毒蓋盡之矣入足厥陰手足少陰行血涼血之要藥也非苦不足以洩熱非甘不足以和血非鹹不足以入血軟堅非溫少陽之氣不足以通行故主痺及疸疸有五此其爲治蓋指蓄血發黃而不專於溼熱者也痺者血

病行血輒堅則痺自愈甘能益血而補中病去血和
補中可知矣苦寒能下洩熱氣故止內崩及下血除
熱故益膀胱踈跌則血瘀血行則踈跌自安涼無病
之血行已傷之血故治蠱毒藥性論味甘主六極傷
心肺吐血瀉血日華子味酸止鼻洪帶下產後血暈
乳結月經不止腸風痔瘻排膿治瘡癩泄精尿血撲
損瘀血皆取其涼血行血苦寒泄熱之功耳

主治參互

同地黃麥門冬當歸身阿膠茅根童便主吐血衄血
諸血熱妄行溢上竅 同牛膝地黃黃耆地榆芍
藥荆芥穗治腸風下血 佐地榆治橫痃魚口有神

本草綱目 卷十
同塵蟲乳香沒藥桂心牛膝地黃主踈跌

簡誤

病人雖見血證若加泄瀉飲食不進者勿服

五味子味酸溫無毒主益氣欬逆上氣勞傷羸瘦補不

足強陰益男子精養五藏除熱生陰中肌菴容為之使惡萎粳勝烏

頭

〔疏〕五味子得地之陰而兼乎天之陽氣故本經味酸

氣溫味兼五而無毒王好古云味酸微苦鹹陰中微

陽入足少陰手太陰血分足少陰氣分主益氣者肺

主諸氣酸能收正入肺補肺故益氣也其主欬逆止

氣者氣虛則上壅而不歸元酸以收之攝氣歸元則

欬逆上氣自除矣勞傷羸瘦補不足強陰益男子精
別錄養五臟除熱生陰中肌者五味子專補腎兼補
五臟腎藏精精盛則陰強收攝則真氣歸元而丹田
煖腐熟水穀蒸糟粕而化精微則精自生精生則陰
長故主如上諸疾也藥性論云五味子君能治中下
氣止嘔逆補諸虛勞令人體悅澤除熱氣病人虛而
有氣兼嗽者加而用之日華子云煖水藏下氣賁狹
冷氣消水腫反胃心腹氣脹止渴除煩熱解酒毒壯
筋骨皆其極功也

主治參互

同人參麥門冬名生脈散能復脈通心 入八味丸

代附子能潤腎強陰 同吳茱萸山茱萸肉豆蔻補

骨脂人參治腎洩良 同懷乾地黃甘枸杞子車前

子覆盆子肉蓯蓉白膠麥門冬人參杜仲白蒺藜黃

蘗主令人有子 同天麥二冬百部阿膠薄荷葉主

肺虛久嗽 君乾葛白藕豆解酒毒良

簡誤

痧癰初發及一切停飲肝家有動氣肺家有實熱應

用黃芩瀉熱者皆禁用

蘭草味辛平無毒主利水道殺蠱毒辟不祥除胸中痰

癖久服益氣輕身不老通神明

疏蘭草稟天地清芬之氣以生故其味辛氣平無毒

入手太陰足陽明經肺主氣肺氣鬱結則上竅閉而
下竅不通胃主納水穀胃氣鬱滯則水穀不以時化
而爲痰癖蠱毒不祥之氣亦胃中受病辛平能散結
滯芬芳能除穢惡則上來諸證自瘳大都開胃除惡
清肺消痰散鬱結之聖藥也久服等語亦言其效之
極功

主治參互

同藿香枇杷葉石斛竹茹橘紅開胃氣之神品 加
入沈水香鬱金白豆蔻眞蘇子蘆根汁下氣開鬱治
噎膈之將成者 同枯樓根麥冬黃連竹葉蘆根汁
治消渴

忍冬味甘溫無毒主寒熱身腫久服輕身長年益壽

〔疏〕忍冬卽金銀花藤一名鷺鷥藤感土之冲氣稟天之春氣故味甘微寒而無毒主寒熱身腫久服輕身長年益壽者甘能益血甘能和中微寒卽生氣也氣味如斯所主宜矣

主治參互

同甘菊花紫花地丁夏枯艸白及白斂貝母連翹鼠黏子治一切腫毒加辟虺雷治一切疔瘡 君地榆芍藥黃連甘艸升麻治一切血痢 單味熬膏小兒服之可稀痘 肘後方忍冬藤熬膏治飛尸伏尸遁尸沈尸風尸尸疰

蛇床子味苦辛甘平無毒主婦人陰中腫痛男子陰痿
溼癢除痺氣利關節癩癧惡瘡溫中下氣令婦人子藏
熱男子陰強久服輕身好顏色令人有子

〔疏〕蛇床子味苦平別錄辛甘無毒今詳其氣味當必
兼溫燥陽也故主婦人陰中腫痛男子陰痿溼癢除
痺氣利關節惡瘡別錄溫中下氣令婦人子藏熱男
子陰強久服輕身令人有子蓋以苦能除溼溫能散
寒辛能潤腎甘能益脾故能除婦人男子一切虛寒
溼所生病寒溼既除則病去身輕性能益陽故能已
疾而又有補益也 雷公云凡使須用濃藍汁并百
部自然汁二味同浸三伏時漉出日乾卻用生地汁

拌蒸從午至亥日乾用此藥只令陽氣盛數號曰鬼
考也

主治參互

蛇床子同巴戟天遠志牛膝何首烏陽起石治男子
陰痿溼癢 同巴戟天牛膝杜仲續斷地黃黃檗白
膠治婦人陰中腫痛 同黃檗山茱萸肉五味子茯
苓車前子香附川續斷補骨脂治一切帶下赤者加
白膠阿膠

簡誤

蛇床子性溫燥腎家有火及下部有熱者勿服

景天味苦酸平無毒主大熱火瘡身熱煩邪惡氣諸蠱

毒癩疔寒熱風痺諸不足花主女人漏下赤白輕身明目久服通神不老

〔疏〕景天卽慎火艸也味苦平別錄酸無毒今詳其功用當是大寒純陰之艸也性能涼血解毒故主大熱火瘡身熱煩邪惡氣諸蠱毒癩疔寒熱風痺諸不足熱解則毒散血涼血涼則陰生故也花功用具如經說第大苦寒之藥而云輕身明目通神不老未可嘗試也

主治參互

治毒虺蛇傷取汁飲并敷傷處立效 治一切赤遊風各種火丹之神藥也故知其性大寒其味大苦耳

本州經疏 卷七
簡誤

一切病得之寒溼惡寒喜熱者勿服

茵陳蒿味苦平微寒無毒主風溼寒熱邪氣熱結黃疸
通身發黃小便不利除頭熱去伏瘕久服輕身益氣耐
老面白悅長年

〔疏〕茵陳蒿感天地苦寒之氣而兼得春之生氣以生
者也其味苦平微寒無毒故主風溼寒熱邪氣熱結
黃疸通身發黃小便不利及頭熱皆溼熱在陽明太
陰所生病也苦寒能燥溼除熱溼熱去則諸證自退
矣去伏瘕及久服輕身益氣耐老面白悅長年未有
修事者日華子云石茵陳味苦涼無毒即山茵陳也

入足陽明太陰足太陽三經除溼散熱結之要藥也

主治參互

茵陳性苦寒能除一切溼熱五疸雖各有其因然同

為溼熱所成故得黃連乾葛黃檗苜蓿五味子治酒

疸如神得二朮茯苓澤瀉車前子木通橘皮神麴

紅麴麥門冬治穀疸同生地黃仙人對坐艸石斛

木瓜牛膝黃檗治疸因酒色而得病名女勞疸仲

景茵陳湯治穀疸寒熱不食食即頭眩心胃不安茵

陳六兩梔子十四枚大黃二兩以水一斗先煮茵陳

減六升內二味煮取三升去滓分溫三服小便當利

尿如皂角汁狀色正赤一宿腹減黃從小便去也

又茵陳五苓散總治諸疸

簡誤

蓄血發黃者禁用

沙參味苦微寒無毒主血積驚氣除寒熱補中益肺氣
療胸痺心腹痛結熱邪氣頭痛皮間邪熱安五藏補中
久服利人

〔疏〕沙參稟天地清和之氣本經味苦微寒無毒王好
古謂甘而微苦苦者味之陰也寒者氣之陰也甘乃
土之冲氣所化合斯三者故補五臟之陰故主血積
驚氣除寒熱補中益肺氣別錄又療胸痺心腹結熱
邪氣頭痛皮間邪熱者苦能洩熱寒能除熱甘能緩

急益血補中故療諸因熱所生病而其功用馴致安
五臟補中久服利人也入手太陰經

主治參互

同天門冬麥門冬百部五味子桑白皮治肺痿肺熱
同貝母枇杷葉栝樓甘艸桑白皮百部天門冬款
冬花治久嗽 葛洪治卒得諸疝少腹及陰中相引
痛如絞自汗出欲死搗細末酒服方寸匕立差

簡誤

臟腑無實熱肺虛寒客之作嗽者勿服

王不留行味苦甘平無毒主金瘡止血逐痛出刺除風
痺內寒止心煩鼻衄癰疽惡瘡瘦乳婦人難產久服輕

身耐老增壽

〔疏〕王不留行稟土金火之氣故味苦甘平平者辛也其氣應溫而無毒苦能洩辛能散甘入血溫能行故主金瘡止血逐痛出刺除風痺內寒癰疽惡瘡瘦乳婦人難產入血活血之要藥也若夫心煩鼻衄應是血分熱病非同涼血藥用未見其可也入足厥陰經

主治參互

同漏蘆貝母鮫鯉甲青皮沒藥山茨菇山豆根栝樓根治乳巖乳癰 同鮫鯉甲白芷通艸豬蹄汁煮服下乳 爲末和蟾酥治疔瘡酒服取汗 千金方有王不留行湯治癰疽妬乳月蝕白禿及面上疣去蟲

止痛王不留行東南桃枝東行吳茱萸根皮各五兩
蛇床子一升牡荊子苦竹葉刺蒺藜子各三升天麻
子一升以水二斗半煮水一斗頻頻洗之

簡誤

孕婦勿服

長松味甘溫無毒主風血冷氣宿疾溫中去風艸似松
葉上有脂山人服之

〔疏〕長松生太行西北五臺諸山得天地溫和之氣而
生故性味甘溫而無毒主風血冷氣宿疾溫中去風
也陳藏器治大風惡疾眉髮墮落百骸腐潰每一兩
入甘艸少許水煎服旬日卽愈又解諸蟲毒當是祛

風之仙藥也

皖南建德
周氏校刊

本艸經疏卷八

草部中品之上

總六十二種今疏其要者三十種

乾薑 生薑 菜耳實 乾葛

栝樓根 苦參 當歸

麻黃 通艸 芍藥 瞿麥

玄參 秦艸 百合 知母

貝母 白芷 淫羊藿 黃芩

狗脊 茅根 紫菀 紫艸

前胡 白鮮 紫參 藁本

草薺 白薇 大青

乾薑味辛溫大熱無毒主胸滿欬逆上氣溫中止血出汗逐風溼痺腸澼下痢寒冷腹痛中惡霍亂脹滿風邪諸毒皮膚間結氣止唾血生者尤良

〔疏〕乾薑稟天地之陽氣故味辛而氣溫雖熱而無毒辛可散邪理結溫可除寒通氣故主胸滿欬逆上氣溫中出汗逐風溼痺下痢因於寒冷止腹痛其言止血者蓋血虛則發熱熱則血妄行乾薑炒黑能引諸補血藥入陰分血得補則陰生而熱退血不妄行矣治腸澼亦其義也生薑能通神明辟惡氣故主中惡霍亂脹滿風邪諸毒皮膚間結氣惟唾血定非寒證別錄載之誤矣

主治參互

乾薑生用同橘皮烏藥白豆蔻除胸滿欬逆上氣

同紫蘇桂枝能溫中出汗加朮則能逐風溼痺 同

朮茯苓人參甘艸治下利寒冷腹痛 炒黑同生地

黃白芍藥當歸牛膝治產後惡露不盡血虛發熱

同生地黃白芍藥麥門冬人參黃耆甘艸升麻治腸

澀下血 同藿香縮砂橘皮紫蘇木香治中惡去木

香加木瓜則治霍亂脹滿加桂枝并治風邪諸毒皮

膚間結氣 同橘皮人參止胃虛嘔逆 同橘皮朮

貝母茯苓治痰癥久不愈 同人參朮桂枝橘皮治

寒瘧 同人參朮甘艸治虛寒泄瀉中寒作泄

本州經疏 卷八
簡誤

乾薑大辛辛能散氣走血久服損陰傷目陰虛內熱
陰虛欬嗽吐血表虛有熱汗出自汗盜汗臟毒下血
因熱嘔惡火熱腹痛法竝忌之

生薑味辛微溫主傷寒頭痛鼻塞欬逆上氣止嘔吐久
服去臭氣通神明

〔疏〕生薑所稟與乾薑性氣無殊第消痰止嘔出汗散
風祛寒止泄疎肝導滯則功優於乾者主治簡誤竝
與前同

藁耳實味苦甘溫葉味苦辛微寒有小毒主風寒頭痛
風溼周痺四肢拘攣痛惡肉死肌膝痛溪毒久服益氣

耳目聰明強志輕身

〔疏〕葉耳蒼耳也得土之冲氣兼稟天之春氣故味甘溫而別錄益之以苦當是無毒葉味苦辛微寒有小毒苦以燥溼甘以和血溫則通暢春氣發生而升故主風寒頭痛風溼周痺四肢拘攣惡肉死肌膝痛溪毒也祛風療溼之藥食療聖惠千金外臺秘要諸方咸堪選用亦無簡誤

葛根味甘平無毒主消渴身大熱嘔吐諸痺起陰氣解諸毒療傷寒中風頭痛解肌發表出汗開腠理療金瘡止痛脇風痛 生根汁大寒療消渴傷寒壯熱 葛穀主下痢十歲已上 葉主金瘡止血 花主消酒一名

雞薺根一名鹿霍殺野葛巴豆百藥毒

〔疏〕葛根稟天地清陽發生之氣其味甘平其性升而無毒入足陽明胃經解散陽明溫病熱邪之要藥也故主消渴身大熱熱壅胸膈作嘔吐發散而升風藥之性也故主諸痺生氣升騰故起陰氣甘者土之沖氣春令少陽應兼微寒故解諸毒及別錄療傷寒中風頭痛解肌發表出汗開腠理甘能和血而除熱故主療金瘡止痛及脇風痛也

主治參互

葛根湯治陽明胃經溫病邪熱頭疼發渴煩悶鼻乾不得眠如渴甚嘔甚則加石膏麥門冬知母竹葉

葛根升麻湯治斑痧初發點粒未形 同一切補腎
益精藥作丸餌則起陰令人有子 同升麻入升陽
散火升陽除溼升陽益胃清暑益氣補中益氣等湯
用

簡誤

傷寒頭痛兼項強腰脊痛及遍身骨疼者足太陽也
邪猶未入陽明故無渴證不宜服五勞七傷上盛下
虛之人暑月雖有脾胃病不宜服

栝樓根味苦寒無毒主消渴身熱煩滿大熱補虛安中
續絕傷除腸胃中痼熱入疸身面黃唇乾口燥短氣通
月水止小便利 實名黃瓜主胸痺悅澤人面 莖葉

療中熱傷暑

枸杞子爲之使惡乾薑畏牛膝乾漆反烏頭

〔疏〕栝樓根稟天地清寒之氣故味苦氣寒而無毒能止消渴身熱煩滿大熱熱散則氣復故又主補虛安中涼血則血和故主續絕傷并除腸胃中痼熱苦寒能除熱故主入疽身面黃唇乾口燥短氣血涼則不瘀故通月水膀胱熱解則小便不頻故能止小便利黃瓜主胸痺及傷寒結胸悅澤人面栝樓仁主消痰莖葉療中熱傷暑皆以其清寒散熱故也

主治參互

根同貝母竹瀝竹茹荆瀝天門冬消痰 同金銀花

連翹貝母白及甘艸消一切腫毒 實同黃連枳實

爲小陷胸湯治傷寒虛結胸

簡誤

脾胃虛寒作泄者勿服

苦參味苦寒無毒主心腹結氣癥瘕積聚黃疸溺有餘

瀝逐水除癰腫補中明目止淚養肝膽氣安五藏定志

益精利九竅除伏熱腸澀止渴醒酒小便黃赤療惡瘡

下部墮平胃氣令人嗜食輕身

立參爲之使惡貝母
漏蘆菟絲子反藜蘆

〔疏〕苦參稟天地陰寒之氣而生其味正苦其氣寒而

沉純陰無毒足少陰腎經君藥也苦以燥脾胃之溼

兼洩氣分之熱寒以除血分之熱熱則生風風溼合

則生蟲故主心腹結氣癥瘕積聚黃疸溺有餘瀝逐

水除癰腫明目止淚利九竅除伏熱腸澀止渴醒酒
小便黃赤療惡瘡下部匿瘡胃家溼熱盛則口淡不
思食食亦不生肌肉溼熱散則胃氣平和而令人嗜
食矣其曰補中養肝膽氣安五臟定志益精輕身者
通指熱散溼除則臟腑氣血安和而致然也味既至
苦性復陰寒善能殺蟲故藥性論治熱毒風皮肌煩
燥生瘡赤癩眉脫主除大熱嗜睡

主治參互

臘月米醋漬入甕中封固主一切天行熱病頭疼口
渴身熱甚者發狂飲碗許得吐則愈汗亦如之 同
胡麻刺蒺藜荆芥穗甘菊花豨薟白芷當歸川芎地

黃天門冬何首烏牛膝漆葉秦艽龍膽草治大麻風
同牡蠣粉白朮青黛治童子胃熱羸瘦疳蚘 同
龍膽草爲末牛膽和丸梧子大生大麥湯服五九日
三治穀疸食勞頭旋心怫鬱不安而發黃疸由失飢
大食胃氣溼熱衝熏所致 集驗方治熱毒足腫疼
欲脫酒煮苦參以漬之

簡誤

苦參雖能洩血中之熱除溼熱生蟲爲癘然以其味
大苦氣大寒久服能損腎氣肝腎虛而無大熱者勿
服

當歸味甘辛溫大溫無毒主欬逆上氣溫瘧寒熱洗洗

在皮膚中婦人漏下絕子諸惡瘡瘍金瘡煮飲之温中

止痛除客血內塞中風痙痙作痙汗不出溼痺中惡客氣虛

冷補五藏生肌肉惡菌茹麩畏莖蒲海藻牡蒙

〔疏〕當歸稟土之甘味天之温氣別錄兼辛大温無毒

甘以緩之辛以散之潤之温以通之暢之入手少陰

足厥陰亦入足太陰活血補血之要藥故主欬逆上

氣也温瘧寒熱洗洗在皮膚中者邪在厥陰也行血

則厥陰之邪自解故寒熱洗洗隨愈也婦人以血爲

主漏下絕子血枯故也諸惡瘡瘍其已潰者温補內

塞則補血而生肌肉也金瘡以活血補血爲要破傷

風亦然竝煮飲之內虛則中寒甘温益血故能温中

血凝則痛活血故痛自止血溢出膜外或在腸胃曰
客血得溫得辛則客血自散也內寒者甘溫益血之
效也中風痙瘓卽角弓反張也汗不出者風邪乘虛
客血分也得辛溫則血行而和故瘓自柔而汗自出
也痺者血分爲邪所客故拘攣而痛也風寒溼三者
合而成痺血行則邪不能客故痺自除也中惡者內
虛故猝中於邪也客氣者外來之寒氣也溫中則寒
氣自散矣虛冷者內虛血不榮於肉分故冷也補五
臟生肌肉者臟皆屬陰陰者血也陰氣足則榮血旺
而肌肉長也患人虛冷加而用之

主治參互

同川芎芍藥地黃名四物湯主婦人血分百病加炒

黑乾薑炒黑豆澤蘭牛膝益母草蒲黃治婦人產後

百病 同桂枝朮菊花牛膝主痺 同牛膝鼈甲橘

皮生薑治瘧在陰分久不止 同酸棗仁遠志人參

茯神治心血虛不得眠 同黃耆生熟地黃黃芩黃

連黃柴治盜汗 同荆芥白芷芎藭地黃治破傷風

同續斷牛膝杜仲地黃鹿角屑桂治一切折傷踈

跌挫閃作疼 同川芎人參治難產及倒生 同益

母草紅藍花蒲黃牛膝治產後血上薄心 同白膠

地黃芍藥續斷杜仲治婦人血閉無子 同地榆金

銀花滑石紅麴治滯下純血裏急後重

簡誤

當歸性辛溫雖能活血補血終是行走之性故致滑腸又其氣與胃氣不相宜故腸胃薄弱洩瀉溏薄及一切脾胃病惡食不思食及食不消竝禁用之卽在產後胎前亦不得入

麻黃味苦溫微溫無毒主中風傷寒頭痛溫瘧發表出汗去邪熱氣止欬逆上氣除寒熱破癥堅積聚五藏邪氣緩急風脇痛字乳餘疾止好唾通腠理疎傷寒頭疼解肌洩邪惡氣消赤黑斑毒不可多服令人虛

[疏]麻黃稟天地清陽剛烈之氣故本經味苦其氣溫而無毒詳其主治應是大辛之藥藥性論加甘亦應

有之氣味俱薄輕清而浮陽也升也手太陰之藥入

足太陽經兼走手少陰陽明輕可去實故療傷寒為

解肌第一專主中風傷寒頭痛溫瘧發表出汗去邪

熱氣者蓋以風寒溼之外邪客於陽分皮毛之間則

腠理閉拒榮衛氣血不能行故謂之實此藥輕清成

象故能去其壅實使邪從表散也欬逆上氣者風寒

鬱於手太陰也寒熱者邪在表也五臟邪氣緩急者

五緩六急也風脇痛者風邪客於脇下也斯皆衛實

之病也衛中風寒之邪既散則上來諸證自除矣其

曰消赤斑毒者若在春夏非所宜也破癥堅積聚

亦非發表所能潔古云去榮中寒邪洩衛中風熱乃

確論也多服令人虛走散真元之氣故也

主治參互

仲景治傷寒有麻黃湯大小青龍湯治肺病上氣有
射干麻黃湯厚朴麻黃湯 同石膏杏仁桑白皮甘
草治寒邪鬱於肺經以致喘滿欬嗽 仲景治少陰
病發熱脈沉有麻黃附子細辛湯及麻黃附子甘草
湯 同桂可治風痺冷痛 蜜炒麻黃治冬月瘡疱
爲風寒所鬱以致倒靨喘悶一服立解

簡誤

麻黃輕揚發散故專治風寒之邪在表爲入肺之要
藥然其味大辛氣大熱性輕揚善散亦陽草也故發

表最速若夫表虛自汗陰虛盜汗肺虛有熱多痰欬嗽以致鼻塞瘡疱熱甚不因寒邪所鬱而自倒靨虛人傷風氣虛發喘陰虛火炎以致眩暈頭痛南方中風癱瘓及平日陽虛腠理不密之人皆禁用汗多亡陽能損人壽戒之戒之自春深夏月以至初秋法所同禁

通草味辛甘平無毒主去惡蟲除脾胃寒熱通利九竅血脈關節令人不忘療脾疸常欲眠心煩噦出音聲療耳聾散癰腫諸結不消及金瘡惡瘡鼠瘦踈折鼈鼻息肉墮胎去三蟲

〔疏〕通草者卽木通也稟清秋之氣兼得土之甘淡故

其味辛平別錄加甘無毒又云微寒味甘而淡氣平
味薄降也陽中陰也入足少陰太陽亦入手少陰太
陽能助西方秋氣下降故利小便專瀉氣滯肺受熱
邪津液氣化之源絕則寒水斷流膀胱受溼熱癰閉
則約束小便不通宜此治之其證胸中煩熱口燥舌
乾咽乾大渴引飲小便淋瀝或閉塞不通脛酸腳熱
竝宜此主之本經主除脾胃寒熱者以其通氣利溼
熱也其曰通利九竅血脈關節以其味淡滲而氣芬
芳也令人不忘者心主記心家之熱去則心清而不
忘矣溼熱生蟲故又主惡蟲療脾疸常欲眠心煩噦
者脾家溼熱壅盛則成疸心脾之熱不清則昏昏欲

眠而心煩噦音聲出於肺肺家之溼熱去則肺金之
氣清而音聲出矣治耳聾者洩腎家之溼火也散癰
腫諸結不消及金瘡惡瘡鼠瘻痿折鼈鼻息肉墮胎
又藥性論治五淋利小便開關格下水排膿止痛及
治人多睡水腫浮大陳士良主理溼熱小便數急疼
少腹虛滿日華子主婦人血閉月候不勻乳結下乳
者皆通竅之所致也

主治參互

同茯苓澤瀉燈心車前子猪苓治膀胱溼熱癰閉如
疏中所引東垣所說入導赤散者以其能瀉丙丁
之火則肺不受邪能通水道水源既清則津液自化

而諸經之溼與熱得由小便洩去故也 同牛膝生
地黃天麥門冬五味子黃檗甘草治尿血 同牛膝
生地黃延胡索治婦人經閉及月事不調

簡誤

木通性通利凡精滑不夢自遺及陽虛氣弱內無溼
熱者禁用妊娠忌之

通脫木卽今之通草也稟土之清氣兼得天之陽氣
故味甘淡氣寒無毒東垣甘平陽中陰降也陽中之
陰必下降故主利陰竅治五淋除水腫癰閉瀉肺解
諸毒蟲痛明目退熱下乳催生以其色白體輕氣寒
味淡故入手太陰經引熱下降以利小便故又入足

陽明胃經通氣上達而下乳汁及除寒熱不通之氣

以其氣寒而降也

主治參互

佐番降香紅麴鮫鯉甲山查沒藥治上部內傷

虛簡誤

虛脫人禁用孕婦人勿服

芍藥味苦酸平微寒有小毒主邪氣腹痛除血痺破堅

積寒熱疝瘕止痛利小便益氣通順血脈緩中散惡血

逐賊血去水氣利膀胱大小腸消癰腫時行寒熱中惡

腹痛腰痛

甄權主婦人血閉不通 日華子主女人一切病胎前產後諸疾治風補勞退熱除煩益

氣日赤腸風瀉血

元素主瀉肝安脾肺收胃氣止瀉利因滕理和血脈收陰氣欬逆氣 好古主理中氣治

脾虛中滿心下痞脇下痛喜噫肺急脹逆喘欬太陽躄
衄目澀肝血不足陽維病苦寒熱帶脈病苦腹痛滿腰
溶溶如坐水中時
珍止下利腹痛後重

〔疏〕芍藥稟天地之陰而兼得甲木之氣本經味苦平
無毒別錄加酸微寒氣薄味厚升而微降陽中陰也
又可升可降陰也降也爲手足太陰引經藥入肝脾
血分圖經載有二種金芍藥色白木芍藥色赤赤者
利小便散血白者止痛下氣赤行血白補血白補而
赤瀉白收而赤散酸以收之甘以緩之甘酸相合用
補陰血通氣而除肺燥故本經主邪氣腹痛除血痺
破堅積寒熱疝瘕通順血脈散惡血逐賊血消癰腫
婦人血閉不通目赤腸風瀉血赤所治也緩中去水

氣利膀胱大小腸中惡腹痛腰痛女人一切病胎前
產後諸病治風補勞退熱除煩益氣瀉肝安脾肺收
胃氣止瀉利固腠理和血脈收陰氣斂逆氣理中氣
治脾虛中滿心下痞脇下痛善噫肺急脹逆喘欬太
陽暈衄目澀肝血不足陽維病苦寒熱帶脈病苦腹
痛滿腰溶溶如坐水中止下痢腹痛後重白所治也
詳味圖經以金木分赤白厥有深旨芍藥味酸寒得
木化金色白故白者兼金氣者也專入脾經血分能
瀉肝家火邪故其所主收而補制肝補脾健脾經
脾主中焦以其正補脾經故能緩中土虛則水泛濫
脾實則水氣自去故去水氣土堅則水清故利膀胱

大小腸中焦不治則惡氣乘虛而客之爲腹痛補脾則中自和而邪不能留腹痛自止矣脾虛則溼氣下流客腎故腰痛得補則脾氣運而上行故腰痛自愈女人以血爲主脾統血故治女人一切病胎前產後無非血分所關酸寒能涼血補血故主胎產諸病土實則金肅而木氣自斂故治風除熱益血故能補勞退熱除煩脾統後天元氣得補則旺故益氣酸寒能瀉肝肝平則脾不爲賊邪所干脾健則母能令子實故安脾肺胃氣屬土土虛則緩而散木化作酸故收胃氣脾虛則中氣下陷而成瀉利東垣以中焦用白芍藥則脾中升陽又使肝膽之邪不敢犯則瀉利自

止矣肺主皮毛腠理脾主肌肉而爲肺之母母能令
子實故固腠理脾統血脾和則血脈自和酸斂入陰
故收陰氣斂逆氣理中氣脾虛則中滿實則滿自消
治中則心下不痞瀉肝則脇下不痛善噫者脾病也
脾健則不噫肝脾之火上炎則肺急脹逆喘欬酸寒
收斂以瀉肝補脾則肺自寧急脹逆喘欬之證自除
涼血補血則太陽黓動自愈脾虛則目澀得補則澀
除肝家無火則肝血自足陽維病苦寒熱及帶脈病
苦腹痛滿腰溶溶如坐水中皆血虛陰不足之候也
肝脾和陰血旺則前證自瘳矣木芍藥色赤赤者主
破散主通利專入肝家血分故主邪氣腹痛其主除

血痺破堅積者血瘀則發寒熱行血則寒熱自止血
痺疝瘕皆血凝滯而成破凝滯之血則痺和而疝瘕
自消涼肝故通順血脈肝主血入肝行血故散惡血
逐賊血榮氣不和則逆於肉裏結爲癰腫行血涼血
則癰腫自消婦人經行屬足厥陰肝經入肝行血故
主經閉肝開竅於目目赤者肝熱也酸寒能涼肝故
治目赤腸風下血者溼熱腸血也血涼則腸風自止
矣

主治參互

白芍藥酒炒爲君佐以炙甘草爲健脾最勝之劑能
治血虛腹痛 同黃連滑石甘草升麻人參蓮肉藕

豆紅麴乾葛為治滯下之神藥 同人參白朮茯苓

炙甘艸肉豆蔻橘皮車前子治脾虛洩瀉 酒炒白

芍藥二兩炙甘艸二錢蓮子去心五十粒水煎治痘

瘡有熱作洩熱甚加酒炒黃連一錢 同荆芥防風

生地黄黃耆炙甘艸治腸風下血 同當歸地黃牛

膝炒黑乾薑續斷麥門冬五味子治產後血虛發熱

君白芷炙甘艸治痘瘡血虛發癢 同黃耆防風

治表虛傷風自汗 赤芍藥同藿香橘皮木瓜甘艸

治中惡腹痛 同芍藥紅花生地黄當歸白芷荆芥

治破傷風發熱疼痛 同牛膝當歸地黃延胡索山

查澤蘭紅藍花五靈脂治初產惡露不下腹痛冬月

加肉桂 同金銀花白芷鯨甲紫花地丁夏枯艸

茜艸生甘菊消一切癰腫 同香附當歸地黃延胡

索青皮治經阻腹痛加五靈脂蒲黃能散惡血逐敗

血

簡誤

白芍藥酸寒凡中寒腹痛中寒作泄腹中冷痛腸胃

中覺冷等證忌之赤芍藥破血故凡一切血虛病及

泄瀉產後惡露已行少腹痛已止癰疽已潰竝不宜

服

瞿麥味苦辛寒無毒主關格諸癰結小便不通出刺決

癰腫明目去翳破胎墮子下閉血養腎氣逐膀胱邪逆

止霍亂長毛髮

〔疏〕瞿麥稟陰寒之氣而生故味苦寒別錄兼辛無毒苦辛能破血陰寒而降能通利下竅而行小便故主關格諸癰結小便不通因於小腸熱甚者寒能散熱辛能散結故決癰腫除溼熱故明目去翳辛寒破血故破胎墮子而下閉血也去腎家溼熱故云養腎氣逐膀胱邪逆者亦洩溼熱故也溼熱客中焦則清濁不分而爲霍亂通利溼熱則霍亂自解矣 用葢殼不用莖葉入藥先須以葢竹漚浸一伏時漚出曬乾

主治參互

入八正散利小腸實熱結閉 千金方立效散治下

焦結熱小便淋閉或有血出或大小便出血瞿麥穗
一兩炙甘艸七錢五分山梔仁炒半兩爲末每服七
錢連鬚葱白七箇燈心五十莖生薑五片水二盞煎
至七分時時溫服

簡誤

瞿麥苦寒兼辛性猛利善下逐凡腎氣虛小腸無大
熱者忌之胎前產後一切虛人患小水不利法竝禁
用水腫蠱脹脾虛者不得施

玄參味苦鹹微寒無毒主腹中寒熱積聚女子產乳餘
疾補腎氣令人明目主暴中風傷寒身熱支滿狂邪忽
忽不知人溫瘧洒洒血痕下寒血除胸中氣下水止煩

渴散頸下核癰腫心腹痛堅癥定五藏久服補虛明目

強陰益精 忌犯銅器 甄權殺癰癩 療癥時珍解斑毒利咽喉

〔疏〕玄參正稟北方水氣而兼得春陽之和故味苦而

微寒無毒別錄兼鹹以其入腎也為足少陰經君藥

黑乃水色苦能下氣寒能除熱鹹能潤下軟堅故主

腹中寒熱積聚女子產乳餘疾補腎氣令人明目者

益陰除熱故補腎而明目也熱則生風故主暴中風

及療傷寒至春變為溫病身熱支滿狂邪忽忽不知

人主溫瘧洒洒者邪熱在表也胸中氣亦邪熱也止

煩渴散頸下核癰腫者解熱軟堅之效也心腹痛亦

熱也堅癥者內熱血瘀而乾也益陰除熱故定五臟

久服補虛強陰益精也散結氣而能軟堅故主瘰癧也散結涼血降火故解斑毒利咽喉也下寒血三字疑有誤

主治參互

同升麻甘艸等分水煎治發斑咽痛出活人書 同

鼠黏子半生半炒各兩許爲末新汲水服治急喉痺

風 同地黃甘菊花蒺藜枸杞子柴胡能明目 同

貝母連翹甘艸栝樓根薄荷夏枯艸治瘰癧 同知

母麥門冬竹葉治傷寒陽毒汗下後熱毒不散心下

懊懜煩不得眠心神顛倒欲絕 同黃連大黃等分

蜜丸如梧子每三四十九丸白湯下治三焦積熱 經

驗方治勞香玄參一斤甘松六兩爲末煉蜜一斤和
勻入瓶中封閉地中埋窖十日取出更用灰末六兩
煉蜜六兩同和入瓶更窖五日取出燒之嘗令聞香
其疾自愈

簡誤

血少目昏停飲寒熱支滿血虛腹痛脾虛泄瀉竝不
宜服

秦艽味苦辛平微溫無毒主寒熱邪氣寒溼風痺肢節
痛下水利小便療風無問久新通身攣急

〔疏〕秦艽感秋金之氣故味苦平別錄兼辛微溫而無
毒潔古氣微溫味苦辛亦可云微寒陰中微陽可升

可降降多於升入手足陽明經苦能洩辛能散微溫
能通利故主寒熱邪氣寒溼風痺肢節痛下水利小
便性能祛風除溼故別錄療風無問久新及通身攣
急能燥溼散熱結故日華子治骨蒸及疔熱甄權治
酒疸解酒毒元素除陽明風溼及手足不遂腸風瀉
血養血榮筋好古泄熱益膽氣咸以其除溼散結清
腸胃之功也雷公云左文列爲秦卽治病右文列爲
芎卽發腳氣先以布拭上黃肉毛令盡用還元湯浸
一宿曬乾用

主治參互

秦芎同乾葛山茵陳五味子黃連白蘊豆木通苜蓿

治酒疸 聖惠方治小便難腹滿不急治之殺人用
秦艽一兩去苗細剉以水一大盞煎取七分去滓每
於食前分爲三服 同薏苡仁木瓜五加皮黃檗蒼
朮牛膝治下部溼熱作疼或生溼瘡 孫真人治黃
疸皮膚眼睛如金色小便赤取秦艽五兩牛乳三升
煮取一升去滓納芒硝一兩分作三服 正元廣利
方療黃疸心煩煩熱口乾皮肉皆黃以秦艽三兩牛
乳一大升同煮取七合去滓分溫再服差此方出許
仁則 崔元亮集驗方凡發背疑似者須便服秦艽
牛膝煎當卽快利三五行卽差

簡誤

下部虛寒人及小便不禁者勿服

百合味甘平無毒主邪氣腹脹心痛利大小便補中益氣除浮腫臚脹痞滿寒熱通身疼痛及乳難喉痺止涕

淚

疏百合得土金之氣而兼天之清和故味甘平亦應微寒無毒入手太陰陽明亦入手少陰故主邪氣腹脹所謂邪氣者卽邪熱也邪熱在腹故腹脹清其邪熱則脹消矣解利心家之邪熱則心痛自瘳腎主二便腎與大腸二經有熱邪則不通利清二經之邪熱則大小便自利甘能補中熱清則氣生故補中益氣清熱利小便故除浮腫臚脹痞滿寒熱通身疼痛乳

難足陽明熱也喉痺者手少陽三焦手少陰心家熱也涕淚肺肝熱也清陽明三焦心部之熱則上來諸病自除

主治參互

仲景治傷寒病百合證有柴胡百合湯 同知母貝

母天門冬麥門冬百部桑根白皮薏苡仁枇杷葉治

肺熱欬嗽及吐膿血 同麥門冬白芍藥甘艸通脫

木利大小便 同知母柴胡竹葉治寒熱邪氣通身

疼痛 同白芍藥炙甘艸麥門冬五味子補中益氣

同白芍藥白茯苓車前子桑根白皮治浮腫

簡誤

中寒者勿服

知母味苦寒無毒主消渴熱中除邪氣肢體浮腫下水
補不足益氣療傷寒久瘧煩熱脇下邪氣膈中惡及風
汗內疸多服令人洩

疏知母稟天地至陰之氣故味苦氣寒而無毒藥性
論兼平日華子兼甘皆應有之入手太陰足少陰經
苦寒能除煩熱至陰能入骨故主消渴熱中除邪氣
脾腎俱虛則溼熱客之而成肢體浮腫肺爲水之上
源腎屬水清熱滋肺金益水臟則水自下矣補不足
者清熱以滋金水之陰故補不足熱散陰生故益氣
苦寒至陰之性煩熱得之卽解故療傷寒久瘧煩熱

及脇下邪氣凡言邪者皆熱也膈中惡卽邪惡之氣
中於膈中也風汗者熱則生風而汗自出也內疸者
卽女勞色疸也熱火旣散陰氣卽生故主上來諸證
也多服令人洩者陰寒之物其味復苦則必傷脾胃
生發之氣故作洩也

主治參互

入白虎湯解傷寒陽明證口渴頭疼煩熱鼻乾不得
眠加竹葉麥門冬名竹葉石膏湯治陽明經前證大
渴引飲頭疼欲破因作勞而得者加人參名人參白
虎湯汗後煩熱不解亦用之 同麥門冬石膏貝母
橘紅鼈甲青蒿牛膝治久瘧煩熱而渴 同貝母天

門冬麥門冬沙參甘艸桑白皮枇杷金五味子百部
治陰虛欬嗽 同黃檗車前子木通天門冬生甘艸
治強陽不痿

簡誤

陽痿及易舉易痿洩瀉脾弱飲食不消化胃虛不思
食腎虛溘洩等證法竝禁用

貝母味辛苦平微寒無毒主傷寒煩熱淋瀝邪氣疝瘕
喉痺乳難金瘡風痙療腹中結實心下滿洗洗惡風寒
目眩項直欬嗽上氣止煩熱渴出汗安五藏利骨髓
白薇爲之使畏
秦艸反烏頭

〔疏〕貝母在地則得土金之氣在天則稟清肅之令故

味辛平別錄兼苦微寒無毒入手太陰少陰陰中微陽可升可降陰也色白象金而主肺肺有熱因而生痰或爲熱邪所干喘嗽煩悶必此主之其主傷寒煩熱者辛寒兼苦能解除煩熱故也淋瀝者小腸有熱也心與小腸爲表裏清心家之煩熱則小腸之熱亦解矣邪氣者邪熱也辛以散結苦以泄邪寒以折熱故主邪氣也經曰一陰一陽結爲喉痺一陰者少陰君火也一陽者少陽相火也解少陰少陽之熱除胸中煩熱則喉痺自愈矣乳難者足厥陰足陽明之氣結滯而不通辛能散結氣通其結滯則乳難自瘳熱解則血涼血涼則不痛故主葉瘡熱則生風故主風

痙別錄又療腹中結實心下滿洗洗惡風寒者肺主皮毛也目眩者熱上攻也項直卽風痙也欬嗽上氣氣上逆也煩熱渴邪不解汗不出者邪熱盛也其性專能散結除熱則上來諸證皆自愈矣病去則五臟自安骨髓自利也

主治參互

同知母前胡葛根麥冬甘艸治陽明斑癩初發壯熱喘嗽有痰不得眠卽本經所謂傷寒煩熱邪氣君橘皮前胡石膏知母麥門冬竹瀝治痰瘧 同知母天麥門冬桑白皮枇杷葉百部桔梗甘艸治肺熱欬嗽及胸中煩熱 同生甘菊紫花地丁金銀花白及

白歛鼠黏子甘艸夏枯艸治一切熱毒消一切癰疽

同鼠黏子玄參枯樓根白殭蠶甘艸桔梗治風痙

同鬱金橘葉連翹枯樓根鼠黏子夏枯艸山茨菇

山豆根玄參消一切結核乳巖瘰癧 同百部百合

薏苡仁麥冬蘇子鬱金童便竹瀝魚腥艸治肺熱吐

膿血 同番降香鬱金橘紅遠志蘇梗蘇子香附白

豆蔻開鬱痰加撫芎神麴并解一切氣鬱

簡誤

寒溼痰及食積痰火作嗽溼痰在胃惡心欲吐痰飲

作寒熱脾胃溼痰作眩暈及痰厥頭痛中惡嘔吐胃

寒作泄法應以辛溫燥熱之藥如南星半夏天麻蒼

白朮茯苓之類治之者竝禁用

白芷味辛溫無毒主女人漏下赤白血閉陰腫寒熱風

頭侵目淚出長肌膚潤澤可作面脂療風邪久渴

宜作瀉

嘔吐兩脇滿風痛頭眩目痒可作膏藥面脂潤顏色

疏白芷得地之金氣兼感天之陽氣故味辛氣溫無

毒其氣香烈亦芳草也入手足陽明足太陰走氣分

亦走血分升多於降陽也性善祛風能蝕膿故主婦

人漏下赤白辛以散之溫以和之香氣入脾故主血

閉陰腫寒熱風頭侵目淚出辛香散結而入血止痛

故長肌膚芬芳而辛故能潤澤辛香溫散得金氣故

療風邪久瀉風能勝溼也香入脾所以止嘔吐療兩

脇風痛頭眩目痒祛風之效也兼可作膏藥面脂潤
顏色乃祛風散結之餘事耳

主治參互

同芍藥黃耆當歸地黃續斷杜仲益母艸香附白膠
主漏下赤白加牛膝主血閉陰腫寒熱 同甘菊細

辛藁本決明子蒺藜子荆芥穗辛夷治頭風侵目淚
出 同黃耆甘艸地黃麥冬五味子能長肉 同黃

耆甘艸茜艸皂角刺金銀花夏枯艸地黃赤芍藥排
膿止痛消癰腫 同升麻柴胡乾葛羌活治溼泄

同羌獨活防風荆芥蒺藜胡麻仁甘菊花何首烏治
風邪 同貝母漏蘆連翹金銀花夏枯艸蒲公英紫

花地丁橘皮消乳癰結核 衍義蝕膿方白芷一兩
單葉紅蜀葵根二兩白芍藥白礬燒枯各半兩別研
餘俱爲細末黃蠟丸如梧子大空腹及飯前米飲下
十九或十五丸俟膿盡仍別以他藥補之 同雄黃
燒可以辟蛇 同白芍藥治痘瘡作痒及皮膚搔痒
簡誤

白芷性升而溫嘔吐因於火者禁用漏下赤白陰虛
火熾血熱所致者勿用癰疽已潰宜漸減去

淫羊藿味辛寒無毒主陰痿絕陽莖中痛利小便益氣
力強志堅筋骨消癰癥赤癰下部有瘡洗出蟲丈夫久

服令人無子

薯蕷爲之使

〔疏〕淫羊藿本得金土之氣而上感天之陽氣故其味
 辛甘其氣溫而無毒本經言寒者誤也入手厥陰為
 補命門之要藥亦入足少陰厥陰可升可降陽也辛
 以潤腎甘溫益陽氣故主陰痿絕陽益氣力強志莖
 中痛者肝腎虛也補益二經痛自止矣膀胱者州都
 之官津液藏焉氣化則能出矣辛以潤其燥甘溫益
 陽氣以助其化故利小便也肝主筋腎主骨益腎肝
 則筋骨自堅矣辛能散結甘能緩中溫能通氣行血
 故主癰癥赤癰及下部有瘡洗出蟲丈夫久服令人
 無子者因陽旺則陽道數舉頻御女而精耗散故無
 子也一名仙靈脾柳文作毘毘人臍也臍為命蒂

故主入命門脩事如雷公法

主治參互

淫羊藿陽草也甘溫益陽氣辛則走而能補宜與白
蒺藜甘枸杞肉蓯蓉五味子牛膝山茱萸同用爲補
陽之妙劑 漬醇酒飲益丈夫興陽道理腰膝冷亦
治偏風不遂大約每藿一斤漬酒十斤如常法勿令
過醉脩事時忌雞犬婦人見 與五味子等分爲末
煉蜜丸如梧子大每三十九薑茶湯下治三焦欬嗽
腹滿不飲食氣不順 聖濟總錄治目昏生翳用仙
靈脾生王瓜卽小栝樓紅色者等分爲末每服一錢
茶下日三服 百一選方治病後青盲目日近者可

治仙靈脾一兩淡豆豉一百粒水一碗半煎一碗頓服卽愈 普濟方治小兒雀盲仙靈脾晚蠶蛾各半兩炙甘艸射干各二錢半爲末羊肝一枚切開摻藥末二錢紫定以黑豆一合米泔一盞同煮熟分二次食以汁送之 痘疹入目用仙靈脾葳靈仙等分爲末每服五分米湯下

簡誤

虛陽易舉夢遺不止便赤口乾強陽不痿竝忌之

黃芩味苦平大寒無毒主諸熱黃疸腸澼洩痢逐水下血閉惡瘡疽蝕火瘍療痰熱胃中熱小腹絞痛消穀利小腸女子血閉淋露下血小兒腹痛 其子主腸澼膿

血 山茱萸龍骨爲之使惡
葱實畏丹砂牡丹藜蘆

疏黃芩稟天地清寒之氣而兼金之性故味苦平無
毒別錄益之以大寒味厚氣薄陰中微陽可升可降
陰也入手太陰少陰太陽陽明亦入足少陽其性清
肅所以除邪味苦所以燥溼陰寒所以勝熱故主諸
熱諸熱者邪熱與溼熱也黃疸腸澼洩痢皆溼熱勝
之病也折其本則諸病自瘳矣苦寒能除溼熱所以
小腸利而水自逐源清則流潔也血閉者實熱在血
分卽熱入血室令人經閉不通溼熱解則榮氣清而
自行也惡瘡疽蝕者血熱則留結而爲癰腫潰爛也
火瘍者火氣傷血也涼血除熱則自愈也別錄消痰

本典經疏 卷八
熱者熱在胸中則生痰火在少腹則絞痛小兒內熱
則腹痛胃中溼熱去則胃安而消穀也淋露下血是
熱在陰分也其治往來寒熱者邪在少陽也五淋者
溼熱勝所致也苦寒清肅之氣勝則邪氣自解是伐
其本也

主治參互

入仲景小柴胡湯治傷寒寒熱邪在少陽亦治少陽
瘧往來寒熱傷寒心下痞滿瀉心湯凡四方皆用黃
芩以其主諸熱利小腸故也又太陽病下之利不止
喘而汗出者有葛根黃芩黃連湯又太陽少陽合病
下利黃芩湯成無已言黃芩苦而入心泄痞熱是黃

芩能入手少陰陽明手足太陰少陽六經明矣蓋以
苦入心寒勝熱泄心火去脾溼則胃火不熏蒸於肺
乃所以救肺也 同芍藥黃連炙甘艸車前子防風
升麻治溼熱作泄腹痛 同芍藥黃連炙甘艸滑石
升麻治滯下腹痛 潔古風熱有痰眉眶作痛酒浸
黃芩同白芷天麻等分爲末每服二錢茶調下 同
芍藥麥門冬白朮能安胎清熱 一味爲末酒服治
灸瘡血出不止 一切火丹爲細末雞子清調敷又
治驢馬負重傷破洗淨傅之主生肌肉

簡誤

黃芩爲苦寒清肅之藥功在除熱邪而非補益之品

當與黃連並列雖能清溼利熱消痰然苦寒能損胃
氣而傷脾陰脾肺虛熱者忌之故凡中寒作泄中寒
腹痛肝腎虛而少腹痛血虛腹痛脾虛泄瀉腎虛溏
瀉脾虛水腫血枯經閉氣虛小水不利肺受寒邪喘
欬及血虛胎不安陰虛淋露法並禁用

狗脊味苦甘平微溫無毒主腰背強機關緩急周痺寒
溼膝痛頗利老人療失溺不節男子腳弱腰痛風邪淋
露少氣目闇堅脊利俛仰女子傷中關節重

草蘇爲之使惡敗醬

疏狗脊稟地中冲陽之氣而兼感乎天之陽氣故其
味苦其氣平別錄云甘微溫無毒兼火化也苦能燥
溼甘能益血溫能養氣是補而能走之藥也入足少

陰腎主骨骨者腎之餘也腎虛則腰背強機關有緩急之病滋腎益氣血則腰背不強機關無緩急之患矣周痺寒溼膝痛者腎氣不足而爲風寒溼之邪所中也茲得補則邪散痺除而膝亦利矣老人腎氣衰乏肝血亦虛則筋骨不健補腎入骨故利老人也失溺不節腎氣虛脫故也經曰腰者腎之府動搖不能腎將憊矣此腰痛亦指腎虛而爲溼邪所乘者言也氣血不足則風邪乘虛客之也淋露者腎氣與帶脈衝任俱虛所致也少氣者陽虛也目得血而能視水旺則瞳子精明肝腎俱虛故目闇女子傷中關節重者血虛有溼也除溼益腎則諸病自瘳脊堅俯仰利

矣

主治參互

得鹿茸白歛艾茯苓蛇床子治室女衝任帶脈三經
虛寒下白帶得牛膝兔絲子地黃山茱萸白膠杜
仲固精強骨壯腰腎得沉香牛膝石斛木瓜五加
皮白蘚皮菊花漆葉蒺藜子能通利關節除五緩六
急

簡誤

腎虛有熱小水不利或短澀赤黃口苦舌乾皆忌之
茅根味甘寒無毒主勞傷虛羸補中益氣除瘀血血閉
寒熱利小便下五淋除客熱在腸胃止渴堅筋婦人崩

中久服利人

〔疏〕茅根正稟土之冲氣而兼感乎春陽生生之氣以生故其味甘氣寒而無毒入手少陰足太陰陽明勞傷虛羸必內熱甘能補脾甘則雖寒而不犯胃甘寒能除內熱故主勞傷虛羸益脾所以補中除熱所以益氣甘能益血血熱則瘀瘀則閉閉則寒熱作矣寒涼血甘益血熱去則血和和則瘀消而閉通通則寒熱自止也小便不利由於內熱也熱解則便自利淋者血分虛熱所致也涼血益血則淋自愈而腸胃之客熱自解津液生而渴亦止矣肝藏血而主筋補血涼肝則筋堅矣血熱則崩涼血和血崩自愈矣血熱

本州經疏 卷九
則妄行溢出上竅爲吐爲咯爲鼻衄齒衄涼血和血
則諸證自除益脾補中利小便故亦治水腫黃疸而
兼理傷寒噦逆也

主治參互

同麥冬生地枸杞子治勞傷內熱 同生地麥冬蘇
子枇杷葉白芍藥甘艸蒲黃童便治諸血 同牛膝
生地黃童便治血熱經枯而閉 同竹茹麥冬石膏
人參治傷寒胃熱噦逆 同芍藥赤小豆赤白茯苓
車前子薏苡仁木瓜石斛木通治水腫 同枇杷葉
竹茹麥冬治火炎內熱反胃上氣 同生地天麥
門冬車前子牛膝白茯苓黃檗五味子枸杞子童便

治溺血

簡誤

因寒發噦中寒嘔吐溼痰停飲發熱竝不得服

紫苑味苦辛溫無毒主欬逆上氣胸中寒熱結氣去蠱毒痿歷安五藏療欬唾膿血止喘悸五勞體虛補不足

小兒驚癇

欬冬為之使惡瞿麥雷丸遠志畏茵陳蒿

疏紫苑感春夏之氣化而兼得地中之金性故味苦溫別錄兼辛無毒入手太陰兼入足陽明苦以泄之辛以散之溫以行之辛先入肺肺主諸氣故主欬逆上氣胸中寒熱結氣去蠱毒亦辛之力也痿歷者陽明之溼熱熏蒸於肺則肺熱而津液不能下滴傷其

氣化以困水之上源故爲痿歷也肺爲五臟之華蓋而主諸氣肺安則能朝百脈散精布液於各臟故云安五臟也療欬逆吐膿血止喘悸者散肺家之邪也能安五臟故治五勞及體虛不足小兒驚癇亦虛而有熱故也熱散則驚癇自止矣得蜜蒸焙良

主治參互

古今傳信方治久嗽紫菀欬冬花各一兩百部半兩爲末作散每服三錢生薑三片烏梅一枚同煎湯下食後臨臥各一服 入噙化丸治陰虛欬嗽 千金方治婦人卒不得小便紫菀末以井花水服三撮便通小便血服五撮便止 斗門方治纏喉風喉閉飲

食不通欲死者返魂艸根一莖洗淨納入喉中取惡涎出卽瘥神效更以馬牙硝津嚙之卽絕根一名紫苑南人呼爲夜牽牛 全幼心鑑治小兒欬嗽聲不出者紫苑末杏仁泥等分入蜜同研丸芡實大每服一丸五味子湯化下

簡誤

觀其能開喉痺取惡涎則辛散之功烈矣而其性溫肺病欬逆喘嗽皆陰虛肺熱證也不宜專用及多用卽用亦須與天門冬百部麥冬桑白皮苦寒之藥參用則無害

紫艸味苦寒無毒主心腹邪氣五疸補中益氣利九竅

通水道療腹腫脹滿痛以合膏療小兒瘡及面皴

〔疏〕紫艸稟天地陰寒清和之氣故味苦氣寒而無毒入足少陰厥陰爲涼血之聖藥故主心腹邪熱之氣五疸者溼熱在脾胃所成去溼除熱利竅其疸自愈邪熱在內能損中氣邪熱散卽能補中益氣矣苦寒性滑故利九竅而通利水道也腹腫脹滿痛者溼熱瘀滯於脾胃則中焦受邪而爲是病溼熱解而從小便出則前證自除也合膏藥療小兒痘瘡及面皴皆涼血之效也

主治參互

同紅花子生地黃甘艸貝母牡丹皮濃煎加生犀角

汁量兒大小以四十九匙至半盞爲度治痘瘡深紅色或紫或黑陷乾枯便閉神效若在一朝及二朝內稍有元氣雖危可生痘疔痘毒咸治之惟痘毒須加黃耆金銀花鼠黏子痘瘡夾斑痧者加硬石膏麥冬知母竹葉一二劑卽去之

簡誤

紫艸苦寒而能通利九竅痘瘡家氣虛脾胃弱泄瀉不思食小便清利者俱禁用

前胡味苦微寒無毒主療痰滿胸脇中痞心腹結氣風頭痛去痰實下氣治傷寒寒熱推陳致新明目益精

半夏

爲之使惡皂
莢畏藜蘆

疏前胡得土金之氣而感秋冬之令故味苦微寒無毒入手太陰少陽陽中之陰降也應有甘辛平寒而能降所以下氣故除痰滿胸脇中痞心腹結氣痰厥頭風痛去痰下氣治傷寒寒熱推陳致新能去實熱及時氣內外俱熱單煮服之亦治一切氣破痰結及邪熱骨節煩悶氣喘欬嗽兼散風邪也

主治參互

同白前杏仁桑白皮甘艸桔梗能豁風熱痰壅喘嗽下氣 入青礞石滾痰丸中代黃芩治一切實痰有殊功其用黃芩者誤也 同羌活乾葛柴胡黃芩桔樓根治時疫寒熱

簡誤

前胡苦辛微寒之藥也能散有餘之邪熱實痰而不
可施諸氣虛血少之病故凡陰虛火熾煎熬真陰凝
結爲痰而發欬嗽真氣虛而氣不歸元以致胸膈逆
滿頭痛不因於痰而因於陰血虛內熱心煩外現寒
熱而非外感者法竝禁用明目益精厥理亦謬

白鮮味苦鹹寒無毒主頭風黃疸欬逆淋瀝女子陰中
腫痛溼痺死肌不可屈伸起止行步療四肢不安時行
腹中大熱飲水欲走大呼小兒驚癇婦人產後餘痛

蝟桔梗茯
苓草薺

〔疏〕白鮮皮稟天地清燥陰寒之氣其味苦寒別錄兼

鹹無毒降多於升陰也入足太陰陽明兼入手太陽
苦能泄熱寒能除熱故主頭風有火證性寒而燥能
除溼熱故主五疸欬逆者實火上衝也得寒而散則
欬逆止矣淋瀝及女子陰中腫痛亦皆下部溼熱乘
虛客腎與膀胱所致也溼痺死肌不可屈伸起止行
步者地之溼氣感則害人皮肉筋脈也脾主四肢惡
溼而喜燥今爲溼邪所干故四肢不安也時行腹中
大熱因而飲水大呼欲走者邪熱盛也小兒驚癇亦
熱則生風之候也散溼除熱蔑不濟矣婦人產後餘
痛應是血虛而熱非所宜也

主治參互

得牛膝石斛薏苡仁黃檗蒼朮療足弱頑痺去下部
溼熱多加金銀花佐以漢防已治下部一切溼瘡

簡誤

下部虛寒之人雖有溼證勿用

紫參味苦辛寒微寒無毒主心腹積聚寒熱邪氣通九
竅利大小便療腸胃大熱唾血衄血腸中聚血癰腫諸
瘡止渴益精

畏辛夷

甄權主散瘀血

婦人血閉不通

好古主狂瘧

蘇恭主金瘡

〔疏〕紫參稟地之陰氣兼得天之寒氣故味苦辛氣寒

而無毒氣味俱厚陰也降也入足厥陰亦入足太陽
陽明專入血分爲除熱散結逐血之要藥故主心腹
積聚寒熱邪氣通九竅利大小便畧同紫艸也苦以

燥溼洩熱辛以散結寒以除邪氣故療腸胃大熱唾
血衄血腸中聚血亦主癰腫諸瘡者榮氣熱則留瘀
而成癰腫血涼而活則自散也能散瘀血故主婦人
血閉不通瘡有血蓄則狂陽明熱則躄血溼熱在腸
胃則血瘀滯而成血痢除熱活血故亦主金瘡

主治參互

仲景金匱玉函經滯下純血紫參湯主之 聖惠方
治吐血不止用紫參阿膠甘艸等分爲末烏梅湯或
糯米湯服一二錢

簡誤

婦人血枯經閉禁用男子勞傷吐血陽氣虛乏脾胃

弱者禁用

藁本味辛苦溫微溫微寒無毒主婦人疝瘕陰中寒腫
痛腹中急除風頭痛長肌膚悅顏色辟霧露潤澤療風
邪痺曳金瘡可作沐藥面脂 實主風流四肢

惡藹
茹

〔疏〕藁本感天之陽氣兼得地之辛味故味辛氣溫別
錄兼苦從火化也無毒入足太陽經溫能通苦能洩
大辛則善散氣厚則上升陽也婦人疝瘕陰中寒腫
痛腹中急皆太陽經寒溼邪爲病也風頭痛者風中
於太陽經也此藥正入本經故悉主之凡癰瘡皆血
熱壅滯毒氣浸淫於肌肉以致潰爛不收辛散苦洩
則毒解滯消肌肉自長矣悅顏色者卽去風作面脂

之義也辟霧露療風邪者辛溫芬芳開發升散之力也
也鞞曳金瘡及甄權治一百六十種惡風鬼疰流入
腰痛冷能化小便通血作沐藥面脂日華子去皮膚
疵奸酒齏粉刺元素主太陽經頭痛顛頂痛及大寒
犯腦痛連齒頰東垣主頭面身體皮膚風溼皆風邪
溼氣干犯太陽經所致也好古主督脈爲病脊強而
厥者督脈竝足太陽經夾脊而上故也

主治參互

同羌活細辛川芎葱白治寒邪鬱於足太陽經頭痛
顛頂痛非此不能除 與木香同用治霧露療清邪
中於上焦 與白芷同作面脂 治小兒疥癬煎湯

浴之并以浣衣 治風又治溼各從其類也

簡誤

溫病頭疼發熱口渴或骨疼及傷寒發於春夏陽證
頭疼產後血虛火炎頭痛皆不宜服

草薺味苦甘平無毒主腰背痛強骨節風寒溼周痺惡
瘡不瘳熱氣傷中恚怒陰痿失溺關節老血老人五緩

薺草爲之使畏葵
根大黃柴胡前胡

〔疏〕草薺得火土之氣而兼稟乎天之陽氣故味苦甘
平無毒陽中之陰降也入足陽明少陰厥陰爲祛風
除溼補益下元之要藥故主腰背痛強骨節風寒溼
周痺惡瘡不瘳熱氣傷中恚怒陰痿失溺關節老血

老人五緩正以苦能燥溼甘入脾而益血故悉主之
甄權又主冷風癢痺腰腳癱緩不遂手足驚掣男子
腰痛久冷腎間有溼膀胱宿水日華子主頭旋癩疾
補水臟堅筋骨益精明目中風失音海藏主肝虛李
氏治白濁莖中痛痔漏壞瘡已上諸證無非陽明溼
熱流入下焦客於肝腎所致此藥祛陽明之溼熱以
固下焦故能去濁分清而療下元虛冷溼邪爲病也

主治參互

得牛膝木瓜薏苡仁黃檗骨碎補續斷杜仲石斛生
地黃狗脊治腰脊痛強骨節加朮菖蒲茯苓治周痺
同黃耆生地黃金銀花皂角刺皂莢子牛膝木瓜

石斛薏苡仁海風藤白殭蠶胡麻治惡瘡久不瘳

同蓮子茯苓車前子木通澤瀉牛膝黃檗甘艸可分
清除溼 楊氏家藏方治真元不足下焦虛寒小便
頻數白濁如膏有萆薢分清飲 又楊子建萬金護
命方云凡人小便頻數不計度數便時莖中痛不可
忍者此疾必先大腑不通水液只就小腸大腑愈加
乾竭甚則渾身熱心躁如此卽重證也此疾本因貪
酒色積有熱毒腐物瘀血之類乘虛流入於小腸故
使時作痛也不飲酒者必平生過食辛熱葷膩之物
又因色傷而然此乃小便頻數而痛與淋證澀而痛
者不同也宜用萆薢一兩水浸少時以鹽半兩同炒

本草綱目卷八
去鹽爲末每服二三錢水一盞煎八分和滓服之使
水道轉入大腸仍以葱湯頻洗穀道令氣得通則小
便數及痛自減也

簡誤

萆薢本除風溼若下部無溼陰虛火熾以致溺有餘
漚莖中痛此真陰不足之候也無溼腎虛腰痛竝不
宜服

菝葜土茯苓與萆薢形雖不同而主治不甚相遠李
氏疑爲一物數種理或然也總之皆善除溼祛風消
水去濁分清固下焦元氣故能興陽道而主諸痺水
惡瘡不瘳也主治及簡誤竝同前忌茗醋

白薇味苦鹹平大寒無毒主暴中風身熱支滿忽忽不知人狂惑邪氣寒熱酸疼溫瘧洗洗發作有時療傷中淋露下水氣利陰氣益精久服利人

〔疏〕白薇全稟天地之陰氣以生本經味苦鹹平別錄益之以大寒無毒可知已暴中風身熱支滿者陰虛火旺則內熱熱則生風火氣煩灼故令支滿火旺內熱則痰隨火湧故令神昏忽忽不知人也狂惑邪氣寒熱酸疼皆熱邪所致也陰氣不足則陽獨盛而爲熱心腎俱虛則熱收於內而爲寒此寒熱之所以交作寒熱作則榮氣不能內榮是以肢體酸疼也先熱而後寒者名曰溫瘧瘧必因暑而發陰氣不足則能

冬不能夏至夏而爲暑邪所傷秋必發爲溫瘧故知
溫瘧之成未有不由陰精不守而得者若夫陰精內
守則暑不能侵瘧何自而作耶上來諸證皆由熱淫
於內之所發經曰熱淫於內治以鹹寒此藥味苦鹹
而氣大寒宜其悉主之也別錄療傷中淋露者女子
榮氣不足則血熱血熱故傷中淋露之候顯矣除熱
益陰則血自涼榮氣調和而前證自瘳也水氣亦必
因於溼熱能除熱則水道通利而下矣終之以益精
者究其益陰除熱功用之全耳

主治參互

婦人調經種子方中往往用之不孕緣於血少血熱

其源必起於真陰不足真陰不足則陽勝而內熱內
熱則榮血日枯是以不孕也益陰除熱則血自生旺
故令有孕也其方以白薇爲君佐以地黃白芍藥當
歸菴蓉白膠黃檗杜仲山茱萸天麥門冬丹參蜜丸
久服可使易孕 凡溫瘧瘴瘧久而不解者必屬陰
虛除瘧邪藥中多加白薇主之則易瘳 凡治似中
風證除熱藥中亦宜加而用之良 天行熱病得愈
或愈後陰虛內熱及餘熱未除者隨證隨經應投藥
中宜加之

簡誤

白薇苦鹹大寒之藥凡傷寒及天行熱病或汗多亡

陽或內虛不思食食亦不消或下後內虛腹中覺冷
或因下過甚洩瀉不止皆不可服

大青味苦大寒無毒主療時氣頭痛大熱口瘡

〔疏〕大青稟至陰之氣故味苦氣大寒無毒甄權云大
青臣味甘能去大熱治溫疫寒熱蓋大寒兼苦其能
解散邪熱明矣經曰大熱之氣寒以取之此之謂也
時行熱毒頭痛大熱口瘡爲胃家實熱之證此藥乃
對病之良藥也

主治參互

千金方小兒口瘡大青十八銖黃連十二銖水三升
煮一升日二服以瘥爲度 肘後方熱病下利因篤

者大青湯大青四兩甘艸赤石脂各三兩豉八合水
一斗煮三升分三服不過二劑差 保幼大全方小
兒卒然肚皮青黑乃血氣失養風寒乘之危惡之候
也大青爲末納口中以酒送下

簡誤

大青乃陰寒之物止用以祛除天行熱病而不可施
之虛寒脾弱之人

文淵閣藏書之人

大清代刻書之體也限以刻刻天日懸評而不

簡端

出大清錄本雖口中良節致下

庚卒然想其清黑八血錄大發其

一巨黃云氏公三則小數二地

清大清越大清四兩世州表

皖南建德

周氏校刊